

42

社121
673
部大;57



文獻通考卷第二百十四



鄱陽馬端臨貴與著

經籍考四十一

子雜家

論衡三十卷

鼂氏曰後漢王充仲任撰充好論說始如詭異終有實理以俗儒守文多失其真乃閉門潛思戶牖墻壁各置刀筆著論衡八十五篇釋物類同異正時俗嫌疑後蔡邕得之祕玩以為談助云世謂漢文章溫厚爾雅及其東也已衰觀此書與潛夫論

風俗通義之類比西京諸書驟不及遠甚乃知世人之言不誣

高氏子畧曰書八十五篇二十餘萬言其爲言皆叙天證敷人事析物類道古今大畧如仲舒玉杯繁露而其文詳詳則禮義莫能覈而精辭莫能肅而括幾於蕪且雜矣漢承滅學之後文景武宣以來所以崇厲表章者非一日之力矣故學者向風承意日趨於大雅多聞之習凡所撰錄日益而歲有加至後漢盛矣往往規度如一律體裁如一家是足以雋美於一時而不足以準的於來世何則

事之鮮純言之少擇也劉向新序說苑奇矣亦復少探索之功闕詮定之密其叙事有與史背者不一二書尚爾况他書乎袁崧後漢書云充作論衡中土未有傳者蔡邕入吳始見之以爲談助談助之言可以了此書矣客有難充書煩重者曰石多玉寡寡者爲珍龍少魚衆少者爲神乎充曰文衆可以勝寡矣人無一引吾百篇人無一字吾萬言爲可貴矣予所謂乏精覈而少肅括者正此謂歟陳氏曰充肅宗時人仕爲州從事治中初作此書北方初未有得之者王朗嘗詣蔡伯喈搜求至隱

處果得論衡提取數卷將去伯喈曰惟我與爾共
勿廣也然自今觀之亦未爲奇

仲長子昌言二卷

崇文總目後漢仲長統撰按本傳統論說古今及時
俗行事著論多昌言凡三十四篇十餘萬言隋唐書
目十卷今所存十五篇分爲三卷餘皆亡

傅子五卷

崇文總目晉傅休奕撰集經史治國之說評斷得失
各爲區例本傳載內外中篇凡四篇亡錄合一百四
十篇今亡一百一十七

公侯政術十卷

崇文總目魯人初撰蓋魯人名初不著其姓未詳何
代人

正訓十卷

崇文總目不著撰人名氏按唐志有正訓二十卷辛
德源撰而此題云陸機撰又止十卷据隋以前書錄
皆無陸機正訓之目晉史機傳亦不言嘗有此書而
德源所著今世已亡疑是其遺書

抱朴子外篇十卷

葛氏曰晉葛稚川撰自號抱朴子博聞深洽江左

絕倫著書甚富言黃白之事名曰內篇其餘外篇
晉書內外通有一百一十六篇今世所傳者四十
篇而已外篇頗言君臣理國用刑之道故附於雜
家云

女誡一卷

陳氏曰漢曹世叔妻班昭撰固之妹也俗號女孝
經

蔣子萬機論二卷

陳氏曰魏太尉平阿蔣濟子通撰按館閣書目十
卷五十五篇今惟十五篇疑非全書也

孫子十卷

陳氏曰晉孫綽與公撰恐依托唐志及中興書目
並無之從程文簡家借錄

劉子五卷

陳氏曰劉晝孔昭撰播州錄事參軍袁孝政爲序
凡五十五篇按唐志十卷劉勰撰今序云晝傷已
不遇天下陵遲播遷江表故作此書時人莫知謂
爲劉勰或曰劉歆劉孝標作孝政之言云爾終不
知晝爲何代人其書近出傳記無稱莫詳其始末
不知何以知其名晝字孔昭也

龍氏曰唐袁政注言修心治身之道而辭頗俗薄
金樓子十卷

鼂氏曰梁元帝撰繹書十篇論歷古興亡之迹箴
戒立言志怪雜說自叙著書聚書通曰金樓子者
在藩時自號

陳氏曰雜記古今聞見末一卷爲自序

瑞應圖十卷

陳氏曰不著名氏按唐志有孫柔之瑞應圖記熊
理瑞應圖譜各三卷顧野王符瑞圖十卷又祥瑞
圖十卷今此書名與孫熊同而卷數與顧合意其

野王書也其間亦多援孫氏以爲注中興書目有
符瑞圖二卷定著爲野王又有瑞應圖十卷稱不
知作者載天地瑞應諸物以類分門今書正爾未
知果野王否又云或題王伯齡至李淑書目又直
以爲孫柔之矣又恐李氏書別一家也

子鈔三十卷

陳氏曰梁尚書左丞潁川庾仲容子仲撰所取諸
子之書百有五家其間頗有與今世見行書不同
者而亡者多矣

意林三卷

鼂氏曰唐馬總會元撰初梁庾仲容取諸家書術
數雜記凡一百七家抄其要語爲三十卷總以其
繁畧失中增損成三軸前有戴叔倫楊伯存兩序
高氏子畧曰子鈔百十有七家仲容所取或數句
或一二百言是有以契其意入其用而他人不可
共享者也馬總意林一遵庾目多者十餘句少者
一二言比子鈔更爲取之嚴錄之精且約也戴叔
倫序其書曰上以防守教之失中以補比事之缺
下以佐屬文之緒有疏通廣博潔淨符信之要無
僻放拘刻譏蔽邪蕩之患亦足以發其機寫其志

矣孔子曰雖小道亦有可觀是於諸子未嘗廢也
聖人旣遠承學易殊義向之少純言議之多詭則
百氏之爲家不能盡叶乎一亦理之所必然也當
篇籍散缺人所未見之時而乃先識其名又得其
語斯足以廣聞見助發揮何止嘗鼎臠啖雞蹠也

陸機賦曰傾羣言之瀝液漱六藝之芳潤

唐常展
日月如

合璧賦云獵英華於百氏
漱芳潤於六籍語自此來是庶幾焉

容齋洪氏隨筆曰唐世未知尊孟子故意林亦列
其書而有差不同者如伊尹不以一介與人亦不
取一介於人之類其他所引書如胡非子隨巢子

纏子王孫子公孫尼子阮子生部姚信士緯殷興
通語牟子周生烈子秦菁子梅子任奕子魏朗子
唐滂子鄒子孫氏成敗志蔣子譙子鍾子張儼默
記裴氏新書袁準正書袁子正論蘇子陸子張顯
析言于子顧子諸葛子陳子要言符子諸書今皆
不傳於世亦有不知其名者

長短經十卷

鼂氏曰唐趙蕤撰北夢瑣言云蕤梓州鹽亭人博

學韜鈴長於經世夫婦俱有隱操不應辟召論王
霸機權正變之術第十卷載陰謀家本缺今存者
六十四篇

炙轂子雜錄注解五卷

鼂氏曰唐王叡撰二儀實錄古今注載事物之始
樂府題解樂府所由起叡輯纂數家之言正誤補
遺劉允併歸一篇

事始三卷

鼂氏曰唐劉孝孫等撰太宗命諸王府官以事名
類推原初始凡二十六門以教始學諸生易大傳

自始作八卦至網罟耒耨日杵之微皆記其本起
檀弓所述亦皆物之始也然則事始之書當係之
儒今以其所取不一故附於雜家

陳氏曰唐吳王諮議弘文館學士南陽劉存撰
理道要訣十卷

陳氏曰唐宰相杜佑君卿撰凡三十三篇皆設問
答之辭末二卷記古今異制蓋於通典中撮要以
便人主觀覽

造化權輿六卷

陳氏曰唐豐王府法曹趙自勔撰天寶七年表上

陸農師著埤雅頗采用之其孫務觀兩嘗爲跋余
求之久不獲己亥歲吳門天慶觀道藏中借錄
刊語二卷

陳氏曰唐國子祭酒李諳撰

資暇集三卷

陳氏曰唐李匡文濟翁撰

兼明書二卷

陳氏曰唐國子太學博士邱光庭撰

蘇氏演義十卷

陳氏曰唐光啓進士武功蘇鶚德祥撰此數書者

皆考究書傳訂正名物辨證訛謬有益見聞尤梁
谿以家藏本刻之當塗

仲蒙子三卷

陳氏曰唐校書郎長樂林慎思虔中撰

致理書十卷

鼂氏曰唐朱朴撰乾寧中爲國子毛詩博士論述
時務五十篇上之詞如近時策斷之類迂緩不切
與馬周所建明不啻霄壤矣昭宗善其言用太宗
擢周故事拔爲相徒以益亂可歎也

兩同書二卷

崇文總目唐羅隱撰采孔老二書著爲內外十篇以
老子修身之說爲內孔子治世之道爲外會其旨而
同元

鼂氏曰唐羅隱撰隱謂老子養生孔子訓世因本
之著內外篇各五其曰兩同書者取兩者同出而
異名之言也

陳氏曰不著名氏中興書目云唐吳筠撰唐藝文
志同但入小說類采孔老爲內外十篇名祝融子
兩同書祝融者謂鬻子爲諸子之首也

宋齊邱化書六卷

龜氏曰偽唐宋齊邱子嵩撰張耒文潛嘗題其後云齊邱之意特大鼠之雄耳蓋不足道其爲化書雖皆淺機小數亦微有以見於黃老之所謂道德其能成功有以也吾嘗論黃老之道德本於清淨無爲遣去情累而其末多流而爲智術刑名何哉仁義生於恩恩生於人情聖人節情而不遣者也無情之至至於無親無親則忍矣此刑名之所以用也文章頗高簡有可喜者其言曰君子有奇志天下不親雖聖人出斯言不廢

格言五卷

龜氏曰偽唐韓熙載叔言撰熙載以經濟自任乃著書二十六篇論古今王伯之道以干李煜首言陽九百六之數及五運迭興事其驕雜如此有門人舒雅序

中華古今注三卷

陳氏曰後唐太學博士馬縞撰蓋惟廣雀豹之書也

續事始五卷

龜氏曰偽蜀馮鑑廣孝孫所著

事原錄三十卷

鼂氏曰皇朝朱繪撰其書事始之類也
物類相感志十卷

鼂氏曰皇朝僧贊寧撰采經籍傳記物類相感者
志之分天地人物四門贊寧吳人以博物稱於世
柳如京徐騎省與之游或就質疑事楊文公歐陽
文忠公亦皆知其名

陳氏曰贊寧國初名釋也

耄智餘書三卷

陳氏曰太子少保致仕澶淵鼂迥德遠撰迥善養
生兼通釋老書年至八十四子孫多聞人

昭德新編一卷

陳氏曰鼂迥撰昭德者京師居第坊名也鼂氏子
孫皆以爲稱

宋景文筆錄三卷

鼂氏曰皇朝宋祁撰皆故事異聞嘉言奧語可爲
談助不知何人所編每章冠以公曰景文乃祁諡
也

中興藝文志筆錄三卷皇朝紹聖中宋肇次其祖庠
遺語凡一百七十條

按二筆錄卷數同祁庠又兄弟也然則一書邪二

書邪當考

近事會元五卷

陳氏曰李上友撰自唐武德至周顯德雜事細務皆記之

徽言三卷

陳氏曰司馬光手抄諸子書題其末曰余此書類舉人抄書然舉子所抄獵其辭余所鈔覈其意舉人志科名余志道德其序書迂叟言六十八蓋公在相位時也方機務填委且將屬疾而好學不厭克勤小物如此所鈔自國語而下六書其目三百

一十有二小楷端無一筆不謹百世之下使人肅然起敬真跡藏邵康節家其諸孫迈守漢嘉從邵氏借刻攜其版歸越今在其羣從述尊古家

泣岐書三卷

陳氏曰蜀人龍昌期稱上昭文相公有後序言求薦進之意

天保正名論八卷

陳氏曰龍昌期撰其學迂僻專非周公妄人也

事物紀原二十卷

陳氏曰不著名氏中興書目十卷開封高承撰元

乾隆十二年校刊

文獻通考卷四百

經籍四十一

七

豐中人凡二百七十事今此書多十卷且數百事
是後人廣之耳

孔氏雜說記一卷

鼂氏曰皇朝孔武仲撰論載籍中前言往行及國
家故實賢哲文章亦時記其所見聞者

鼂氏客語一卷

陳氏曰鼂說之以道撰

王氏雜說十卷

鼂氏曰皇朝王安石介甫撰蔡京爲安石傳其畧
曰自先王澤竭國異家殊由漢迄唐源流浸深宋

興文物盛矣然不知道德性命之理安石奮乎百
世之下追堯舜三代通乎晝夜陰陽所不能測而
入於神初著雜說數萬言世謂其言與孟軻相上
下於是天下之士始原道德之意窺性命之端云
所謂雜說卽此書也以京之夸至如此且不知所
謂通乎晝夜陰陽所不能測而入於神者爲何等
語故著之

汲世論一卷

鼂氏曰右未詳何人所著多稱元祐間事且喜論
兵疑呂氏書也凡十門

馭臣鑒古二十卷

鼂氏曰右皇朝鄧綰撰元豐中爲中丞獻之朝未幾坐操心頗僻賦性姦回論事薦人不循分守貶廣川家學三十卷

陳氏曰中書舍人董弅令升撰述其父道之學

蘇文定公遺言

蘇轍子由撰周平園序畧曰文定公晚居許昌造深矣避禍謝客縱有門人亦罕與言其聞緒論者子孫而止耳然諸子宦游惟長孫將作監丞仲滋諱籀年十有四才識卓然侍左右者九年記遺言

百餘條未嘗增損一語旣老以授其子郎中君詡郎中復以授其子道州史君森予嘗與道州同僚故請題其後昔人疑黃樓賦非出公手東坡蓋親爲之辯今公自謂此賦學兩都晚年不復作此工夫之文至和陶擬古九首則明言坡代作識者當自得之又云讀書須學爲文餘事作詩然公詩自工謂儲光義高處似陶淵明平處似王摩詰而以韓子蒼比之子蒼由是知名公素不作長短句今漁家傲一篇雖用禪語而句法極高乃知公非不能詞直不爲耳此皆學者所宜知也

石林家訓一卷

陳氏曰葉夢得少蘊撰

石林過庭錄二十七卷

陳氏曰葉夢得與諸子講說者其中子模編輯之
程氏廣訓六卷

陳氏曰中書舍人三衢程俱致道撰

藝苑雌黃二十卷

陳氏曰建安嚴有翼撰大抵辯正訛謬故曰雌黃
其日子史傳注詩詞時序名數聲畫器用地理動
植神怪雜事卷爲二十條凡四百條硯岡居士唐

稷序之有翼常分教泉荆二郡

湘素雜說十卷

鼂氏曰皇朝黃朝英撰所記二百事朝英建州人
紹聖後舉子也爲王安石之學者以贈之以芍藥
爲男淫女貽我握椒爲女淫男鄙褻不典前輩嘗
以是爲嗤笑朝英特愛重之以爲得詩人深意其
他可知矣

陳氏曰陳與者爲之序言甲辰六試吏部不利蓋
政宣中士子也其書亦辯正名物而學頗迂僻

程氏演繁露曰此書辯正世傳名物音義多有歸

宿而時有闕疑者至釋宋子京刈麥詩以四月爲
麥秋而曰按北史蘇綽傳麥秋在野其名遠矣是
未嘗讀月令也以此知博記之難

聖賢眼目一卷

陳氏曰曲河洪興祖慶善撰摘取經子數十條以
已見發明之

義林一卷

陳氏曰眉山程敦厚子山撰其上世東坡外家也
子山爲人凶險附秦檜至右史後坐謫死

演繁露十四卷 續十卷

陳氏曰程大昌泰之撰初在館中見繁露書以爲
非說見春秋類又引古今注冕旒綴玉下重如繁
露然蓋與玉杯竹林同爲托物名篇可想見也今
曰演繁露者意古之繁露與爾雅釋名廣雅刊誤
正俗之類云耳

考古編十卷 續編十卷

陳氏曰程大昌撰上自詩書下及史傳世俗雜事
有可考見者皆筆之

楚澤叢語八卷

陳氏曰右廸功郎李著吉光撰不知何人作其書

專闢孟子紹興中撰進大意以爲王氏之學出於
孟子然王氏信有罪矣孟氏何與焉此論殆得於
景迂之微意

容齋隨筆續筆三筆四筆各十六卷 五筆十卷

陳氏曰翰林學士番易洪邁景盧撰每編皆有小
序五筆未成書

朱子語錄曰洪景盧隨筆中辯得數種僞書皆是
但首卷載歐帖事却非實世間僞書如西京雜記
顏師古已辯之矣

續顏氏家訓八卷

陳氏曰左朝請大夫李正公撰皆用顏氏篇目而
增廣之

習學記言五十卷

陳氏曰閣學士龍泉葉適正則撰自六經諸史子
以及文鑑皆有論說大抵務爲新奇無所蹈襲其
文刻峭精工而義理未得爲純明正大也自孔子
之外古今百家隨其淺深咸有遺論無得免者而
獨於近世所傳子華子篤信推崇之以爲真與孔
子同時可與六經並考而不悟其爲僞也且旣曰
其書甚古而文與今人相近則亦知之矣遠自七

畧及隋唐國史諸志李邕鄆諸家書目皆未之有
豈不足以驗其非古出於近世好事能文者之所
爲而反謂孟荀以來無道之者蓋望而棄之也不
亦惑乎

準齋雜說一卷

陳氏曰錢唐吳如愚撰

灌畦暇語一卷

陳氏曰不知作者雜取史傳事畧述己意

忘筌書二卷

陳氏曰潘植子醇撰新安所刻本凡八十二篇與

館閣書目諸儒鳴道集及余家寫本篇數皆不同
本已見儒家而館目置之雜家者以其多用釋老
之說故也今亦別錄於此

袁氏世範三卷

陳氏曰樂清令三衢袁采君載撰

文獻通考卷第二百十四

文獻通考卷第二百十五

鄱陽馬端臨貴與著

經籍考四十二

子 小說家

漢藝文志小說者流其源蓋出於稗官稗傍卦切音

實細也李如淳曰稗音溝家排九章細米為稗街談巷說其細碎之言也昔王者欲知閭巷之風俗故立稗官使稱說之今世偶語為稗顏師古又曰稗音稊稗之稗不與溝排同也稗官小官名漢名臣奏唐林請省置吏公卿大夫至都街談巷語道聽塗說者之官稗官各減十三是也

所造也孔子有曰雖小道必有可觀者焉致遠恐泥是以君子弗為也然亦弗之滅也閭里小智之所及

亦使綴而不忘如或一言可采此亦芻蕘狂夫之議也

漢志十五家一千三百八十篇

隋志二十五部合一百五十九卷

唐志三十九家四十一部三百八卷

失姓名二家李恕以下不著錄七十

八家三百二十七卷

宋三朝志一百四十六部一千一百五十二卷

宋兩朝志四十六部一百一十三卷

宋四朝志四十六部四百一十二卷

宋中興志二百三十二家二百六十部一千九百五十

五卷

燕丹子三卷

中興藝文志丹燕王喜太子此書載太子丹與荆軻事

周氏涉筆曰燕丹荆軻事既卓偉傳記所載亦甚崛竒今觀燕丹子三篇與史記所載皆相合似是史記事本也然烏頭白馬生角機橋不發史記則以怪誕削之進金擲鼃膾千里馬肝截美人手史記則以過當削之聽琴姬得隱語史記則以徵所聞削之司馬遷不獨文字雄深至於識見高明超

出戰國以後其書芟削百家誣謬亦豈可勝計哉
今世祇謂太史公好奇亦未然也又如許由伊尹
范蠡亦多疑辭惟信孔氏門人傳錄太過如五帝
本紀孔子世家其間秕妄居多是亦未能充其類
也

鼂氏曰不題撰人

神異經一卷

陳氏曰稱東方朔撰張茂先傳

十洲記一卷

鼂氏曰漢東方朔撰班固贊言朔之談諧逢占射

覆其事浮淺童兒牧豎莫不眩耀而後世好事者
因取奇言怪語附著之朔豈謂此書之類乎

陳氏曰亦稱東方朔撰二書詭誕不經皆假托也
漢書本傳敘朔之辭末言劉向所錄朔書具是矣
世所傳他事皆非也贊又言朔之談諧其事浮淺
行於衆庶而後世好事者因取奇言怪語附著之
朔故詳錄焉史家欲祛妄惑可謂明矣

洞冥記四卷 拾遺一卷

鼂氏曰後漢郭憲子橫撰其序言漢武明雋特異
之主東方朔因滑稽浮誕以匡諫洞心於道教使

冥跡之奧昭然顯著故曰洞冥

陳氏曰題漢武別國洞冥記其別錄又於御覽中抄出然則四卷亦非全書也凡若是者藏書之家備名數而已無之不足爲損有之不足爲益况於詳略尤非所計也唐志入神僊家

周盧注博物志十卷 盧氏注六卷

殷文奎啟注晉張華讀三十車書作博物志四百武帝以爲繁只作十卷

鼂氏曰晉張華撰載歷代四方奇物異事兩本前六卷略同無周氏注者稍多而無後四卷周名曰

用西京賦曰小說九百起自虞初周人也其小說之來尚矣然不過志夢卜紀譎怪記談諧之類而已其後史臣務採異聞往往取之故近時爲小說者始多及人之善惡甚者肆喜怒之私變是非之實以誤後世至於譽桓溫而毀陶侃褒盧杞而貶陸贄者有之今以志怪者爲上褒貶者爲下云
陳氏曰其書作奇聞異事華能辯龍鮓識劍氣其學固然也

王子年拾遺記十卷

鼂氏曰梁蕭綺敘錄晉王嘉字子年嘗著書百二

十篇載伏羲以來異事前世奇詭之說書逸不完
綺綴拾殘缺而敘之

名山記一卷

陳氏曰亦稱王子年卽前之第十卷大抵皆詭誕
嘉苻秦時人見晉書藝術傳

世說新語十卷 重編世說十卷

鼂氏曰宋劉義慶撰梁劉孝標注東漢以後事分
三十八門唐藝文志云劉義慶世說八卷劉孝標
續十卷而崇文總目止載十卷當是孝標續義慶
元本八卷通成十卷耳家本有二一極詳一殊略

略有稱改正未知誰氏所定然其目則同劉知幾
頗言此書非實錄予亦云

陳氏曰今本三卷敘錄二卷敘錄者近世學士新
安汪藻彥章所爲也首爲考異繼列人物世譜姓
字異同末記所引書目按唐志作八卷劉孝標續
十卷自餘諸家所藏卷第多不同敘錄詳之此本
董令升刻之嚴州以爲晏元獻公手自校定刪去
重複者

高氏緯略曰義慶採擷漢晉以來佳事佳話爲世
說新語極爲精絕而猶未爲奇也梁劉孝標注此

書引援詳確有不言之妙如引漢魏吳諸史乃子傳地理之書皆不必言只如晉氏一朝史及晉諸公別傳譜錄文章凡一百六十六家皆出於正史之外紀載特詳聞見未接實爲注書之法

殷芸小說十卷

鼂氏曰宋殷芸撰述秦漢以來雜事予家本題曰劉餗李淑以爲非

陳氏曰邯鄲書目云或題劉餗非也今此書首題秦漢魏晉宋諸帝注云齊殷芸撰非劉餗明矣故其敘事止宋初蓋於諸史傳記中抄集或稱商芸

者宣祖廟未祧時避諱也

述異記二卷

鼂氏曰梁任昉傳昉家藏書三萬卷天監中採輯前世之事纂新述異皆時所未聞將以資後來屬文之用亦博物之意唐志以爲祖同所作誤也

續齊諧記一卷

陳氏曰梁奉朝請吳均撰齊諧志怪本莊子語也唐志又有東陽無疑齊諧志今不傳此書殆續之者歟

北齊還冤志二卷

陳氏曰顏之推撰

古今同姓名錄一卷

陳氏曰梁元帝撰有陸善經者續之至五代時

隋唐嘉話一卷 劉餗小說三卷

陳氏曰並唐右補闕劉餗鼎卿撰

博異志一卷

鼂氏曰題曰谷神子纂序稱其書頗箴規時事故

隱姓名或曰名還古而竟不知其姓志怪之書也

陳氏日記唐初及中世事

卓異記一卷

鼂氏曰唐李翱撰或題云陳翱開成中在襄陽記

唐室君臣功業殊異者二十七類

陳氏日記當時君臣卓絕盛事

集異記二卷

鼂氏曰唐薛用弱撰集隋唐間談詭之事一題古

異記首載徐佐卿化鶴事

陸氏集異記二卷

鼂氏曰唐陸勳纂語怪之書也凡三十二事言犬

怪者居三之一

稽神異苑十卷

乾隆十二年校刊

經籍四十二

七

龍氏曰題云南齊焦度撰雜編傳記鬼神變化及草木禽獸妖怪譎詭事按焦度南安氏也質訥朴戇以勇力事高帝決不能著書又卒於建元四年而所紀有梁天監中事必非也唐志有焦路窮神秘苑十卷豈卽此書而相傳之訛歟

朝野僉載補遺三卷

鼂氏曰唐張鷟文成撰分三十五門載唐朝雜事鷟自號浮休子蓋取莊子其生也浮其死也休之義

容齋洪氏曰僉載紀事皆瑣尾摘裂且多媒語

陳氏曰其書本三十卷此特其節略耳別求之未獲

冥報記二卷

陳氏曰唐吏部尚書京兆唐臨本德撰

辨疑志三卷

陳氏曰唐宣武行軍司馬吳郡陸長源撰辨俚俗流傳之妄

宣室志十卷

鼂氏曰唐張讀聖明撰纂輯仙鬼靈異事名曰宣室志者取漢文召見賈生論鬼神之義苗台符爲

之序

封氏見聞記五卷

鼂氏曰唐封演撰分門記儒道經籍人物地里雜事且辨說訛謬蓋著其所見聞如此

陳氏曰前紀典故未及雜事頗有可觀

劉公嘉話一卷

鼂氏曰唐韋絢撰劉公謂禹錫絢字文明執誼子也咸通中節度義武幼從學於禹錫錄其話言

戎幕閑談一卷

鼂氏曰唐韋絢撰太和中爲李德裕從事記德裕

所談

平泉草木記一卷

鼂氏曰唐李德裕撰記其別墅奇花異草樹石名品仍以嘆詠其美者詩二十餘篇附於後平泉卽別墅地名

元怪錄十卷

鼂氏曰唐牛僧孺撰僧孺爲宰相有聞於世而著此等書周秦行紀之謗蓋有以致之也

陳氏曰唐志十卷又言李復言續錄五卷館閣書目同今但有十一卷而無續錄

續元怪錄十卷

鼂氏曰李復言續僧孺書分仙術感應三門

周秦行紀一卷

鼂氏曰唐牛僧孺自敘所遇異事賈黃中以為韋瓘所撰瓘李德裕門人以此誣僧孺

洽聞記三卷

鼂氏曰唐鄭常撰記古今神異詭譎事凡百五十六條或題曰鄭遂

甘澤謠一卷

鼂氏曰唐袁郊撰載譎異事九章咸通中久雨卧

疾所著故曰甘澤謠

陳氏曰咸通戊子自序以其春雨澤應故有甘澤成謠之語以名其書

河東記三卷

鼂氏曰唐薛漁思撰亦記譎怪事序云續牛僧孺之書

酉陽雜俎二十卷 續酉陽雜俎十卷

鼂氏曰唐段成式撰自序云縫掖之徒及怪及戲無侵於儒詩書為大美史為折俎子為醯醢大小二酉山多藏奇書故名篇曰酉陽雜俎分三十門

爲二十卷其後續十卷

陳氏曰所記固多譎怪其標目亦奇詭如天咫玉格壺史貝編尸窆之類成式文昌之子

因話錄六卷

鼂氏曰唐趙璘撰字澤章大中時爲衢州刺史記唐史逸事

劇談錄三卷

鼂氏曰康駢字駕言撰乾符中登進士第書咸載唐世故事

唐語林十卷

鼂氏曰未詳撰人效世說體分門記唐世名言新
增嗜好等十七門餘皆仍舊

史話三卷

鼂氏曰不題撰人自後漢及江左朝野雜事皆記
之

資暇三卷

鼂氏曰唐李匡義濟翁撰序稱世俗之談類多訛
誤雖有見聞默不敢證故著此書上篇正誤中篇
譚原下篇本物以資休暇云

芝田錄一卷

乾隆十二年校刊

經籍四十二

七

鼂氏曰敘謂嘗憇緱氏故取潘岳西征賦名其書記隋唐雜事未詳何人總六百條

朝廷卓絕事一卷

鼂氏曰唐陳峴撰記唐朝忠賢卓絕五十事

杜陽雜編三卷

鼂氏曰唐蘇鶚字德祥撰光啟中進士家武功杜陽川雜錄廣德以至咸通時事

雲溪友議三卷

鼂氏曰唐范攄撰記開元以後事攄五溪人故以名其書

陳氏曰咸通時人唐志三卷今本十二卷

談賓錄十卷

鼂氏曰唐朝璩子溫撰皆唐朝史之所遺文武間人

乾膳子三卷

鼂氏曰唐溫庭筠撰序謂語怪以悅賓無異膳味之適口故以乾膳名書

陳氏曰序言不爵不觥非魚非炙能悅諸心聊甘衆口庶乎乾膳之義膳與饌同字從肉見古禮經尚書故實一卷

龜氏曰唐李綽編崇文總目謂尚書卽張延賞也
綽記延賞所談故又題曰尚書談錄按其書稱嘉
貞爲四世祖疑非延賞也

陳氏曰其書首言賓護尚書河東張公三代相門
謂嘉貞延賞弘靖弘靖盧龍失御貶賓客分司綽
唐末人未必及弘靖弘靖之後文規次宗彥遠皆
不登八座未詳所謂唐志卽以爲延賞尤不然

家學要錄一卷

龜氏曰唐柳珪採其曾祖彥昭祖芳父冕家集所
記累朝典章因革時政得失著此錄小說之尤者

也

常侍言旨一卷

龜氏曰唐柳珪記其世父芳所著凡十六章未有劉
出求及上清傳附

異聞集十卷

龜氏曰唐陳翰編以傳記所載唐朝奇怪事類爲
一書

陳氏曰唐末人見唐志而第七卷所載王魁乃本
朝事當是後人勦入之耳

聞奇錄一卷

陳氏曰不著名氏當是唐末人
松窓錄一卷

鼂氏曰唐韋叡撰記唐朝故事

瀟湘錄十卷

陳氏曰唐校書郎李隱撰館閣書目云爾唐志作
柳詳未知書目何據也

幽閑鼓吹一卷

鼂氏曰唐張固撰紀唐史遺事二十五篇懿僖間
人

知命錄一卷

陳氏曰唐劉愿撰凡二十事
前定錄一卷

陳氏曰唐崇文館校書鍾輅撰凡二十二事別本
又有續錄二十四事

雜纂一卷

陳氏曰唐李商隱義山撰俚俗常談鄙事可資戲
笑以類相從今世所稱殺風景蓋出於此又有別
本稍多皆後人附益

巽岩李氏曰用諸酒杯流行之際可謂善譎其言
雖不雅馴然所訶諄多中俗病聞者或足以爲戒

不但爲笑也

盧氏雜說一卷

陳氏曰唐盧言撰

廬陵官下記二卷

陳氏曰段成式撰爲吉州刺史時

唐缺史三卷

陳氏曰唐高彥休撰自號參寥子乾符中人

北里志一卷

鼂氏曰唐孫棨撰記大中進士游俠平康事孫光憲言棨之意在譏盧相攜也蓋攜之女與其甥通

攜知之遂以妻之殺家人以滅口云

五泉筆端三卷 又別一卷

陳氏曰不著名氏有序中和三年作末有跋云扶風李昭德家藏之書也卽故淮海相公孫又稱黃巢陷洛之明年跋亦不知何人別一本號玉泉子此此本少數條而多五十二條無序跋錄其所多者爲一卷

三水小牘三卷

陳氏曰唐皇甫牧遵美撰天祐中人三水者安定屬邑也

醉鄉日月三卷

陳氏曰唐皇甫松子奇撰唐人飲酒令此書詳載然今人皆不能曉也

龍城錄一卷

陳氏曰稱柳宗元撰龍城謂柳州也羅浮梅花夢事出其中唐志無此書蓋依托也或云王銍性之作

朱子語錄曰柳文後龍城錄雜記王銍所爲也子厚敘事文字多少筆力此記衰弱之甚皆寓古人詩文中不可曉知底於其中似暗影出

唐朝新纂三卷

陳氏曰融州副史石文德撰

豪異秘纂一卷

陳氏曰無名氏所錄五事其扶餘國王一則所謂虬須客者也

樹萱錄一卷

陳氏曰不著名氏序稱纂尚書滎陽公所談者亦不知何人又云普聖園丘之明年普聖者僖宗由普王踐位也書雖見唐志今亦未必真本或云劉燾無言所爲也

續樹萱錄一卷

容齋洪氏隨筆曰頃在秘閣抄書得續樹萱錄一卷其中載隱君子元撰夜見吳王夫差與唐諸詩人吟詠事李翰林詩曰芙蓉露濃紅壓枝幽禽感秋花畔啼玉人一去未回馬梁間燕子三見歸張司業曰綠頭鴨兒啞萍藻採蓮女郎笑花老杜舍人曰鼓鼙夜戰北窓風霜葉泐階貼亂紅三人皆全篇杜工部曰紫領寬袍漉酒巾江頭蕭散作閑人白少傅曰不因霜葉辭林去的當山翁未覺秋李賀曰魚鱗鬢空排嫩碧露桂稍寒掛團壁三人

皆未終篇細味其體格語句往往逼真後閱秦少游集有秋興九首皆擬唐人前所載咸在焉關子東爲秦集序云擬古數篇曲盡唐人之體正謂是也何子楚云續萱錄乃王性之所作而托名他人今其書才有三事其一曰賈博諭一曰全若虛一曰元撰詳命名之義蓋取諸子虛亡是公云

雲仙散錄一卷

陳氏曰稱唐金城馮贄撰天復元年敘馮贄者不知何人自言取家世所蓄異書撮其異說而所引書名皆古今所不聞且其記事造語如出一手政

如世俗所行東坡杜詩注之類然則所謂馮贄者
及其所蓄書皆子虛烏有也亦可謂枉用其心者
矣

容齋洪氏隨筆曰俗間所傳淺妄之書如所謂雲
仙散錄老杜事實之類皆絕可笑然士大夫或信
之孔傳續六帖採摭唐事殊有工而悉載雲仙錄
中事自穢其書近世南劍州學刊散錄可毀

文獻通考卷第二百十五

文獻通考卷第二百十六

鄱陽馬端臨貴與著

經籍考四十三

子小說家

傳奇三卷

鼂氏曰唐裴鉞撰唐志稱鉞高駢客故其書所記
皆神仙詭譎事駢之惑呂用之未必非鉞輩導諛
所致

陳氏曰尹師魯初見范文正岳陽樓記曰傳奇體
耳然文體隨時理勝爲貴文正豈可與傳奇同日

語哉蓋一時戲笑之談耳唐志三卷今六卷皆後
人以其卷帙多而分之也

撫言十五卷

鼂氏曰唐王定保撰分六十三門記唐朝進士應
舉登科雜事

陳氏曰定保光化三年進士爲吳融子華壻喪亂
後入湖南棄其妻弗顧士論不齒

金華子三卷

鼂氏曰唐劉崇遠撰金華子其自號蓋慕皇初平
爲人也錄唐大中後事一本題曰劉氏雜編

陳氏曰崇遠五代時人仕至大理司直

北夢瑣言二十卷

鼂氏曰荆南孫光憲撰光憲蜀人從陽玘元證遊
多聞唐世賢哲言行因纂輯之且附以五代十國
事取傳田於江南之夢自以爲高氏從事在荆江
之北故命編云

陳氏曰光憲仕荆南高從誨爲黃州刺史三世在
幕府後隨繼冲入朝有薦於太祖者將用爲學士
未及而卒光憲自號葆光子

皮氏見聞錄五卷

鼂氏曰五代皮光業撰唐末爲餘杭從事記當時
詭異見聞自唐乾符四年迄晉天福二年自號鹿
門子

耳目記一卷

陳氏曰無名氏邯鄲書目云劉氏撰未詳其名記
唐末以後事

紀聞談三卷

陳氏曰蜀潘遠撰館閣書目按李淑作潘遺今考
邯鄲書目亦作潘遠其曰遺者本誤也所記隋唐
遺事

鑑誠錄十卷

鼂氏曰後蜀何光遠撰字輝夫東海人唐證中纂
輯唐以來君臣事迹可爲世鑒者前有劉曦度序
李獻臣云不知何時人考之不誤也

葆光錄三卷

陳氏曰陳纂撰自號襲明子所載多吳越事當是
國初人

後史補三卷

陳氏曰前進士高欲拙撰

野人閑話五卷

陳氏曰成都景煥撰記孟蜀時事乾德二年序
續野人閑話二卷

陳氏曰不知作者

稽神錄六卷

鼂氏曰南唐徐鉉撰記怪神之事序稱自乙未歲
至乙卯凡二十年僅得百五十事楊大年云江東
布衣蒯亮好大言夸誕鉉喜之館於門下稽神錄
中事多亮所言

陳氏曰元本十卷今無卷第總作一卷當自是他
書中錄出者

賈氏談錄一卷

鼂氏曰南唐張洎奉使來朝錄賈黃中所談三十
餘事歸獻其主

燈下閑談二卷

陳氏曰不知作者

啓顏錄八卷

陳氏曰不知作者雜記恢諧調笑事唐志有侯白
啓顏錄十卷未必是此書然亦多有侯白語但訛
謬極多

開顏集三卷

乾隆十二年校刊

經籍四十三

四

陳氏曰校書郎周文規撰未知何時人以古笑林多猥俗乃於書史中抄出可資談笑者爲此篇
唐撫言十五卷

陳氏曰鄉貢進士何晦撰其序言太歲癸酉下第於金陵鳳臺旅舍癸酉者開寶六年也時江南獨未下晦蓋其國人歟

洛陽摺紳舊聞記十卷

陳氏曰丞相曹國張齊賢師亮撰所錄張全義治洛事甚詳

太平廣記五百卷

鼂氏曰皇朝太平興國初詔李昉等取古今小說編纂成書同太平御覽上之賜名廣記
夾漈鄭氏曰太平廣記乃太平御覽中別出廣記一書專記異事

鹿革事類三十卷 鹿革文類三十卷

鼂氏曰節太平廣記事實成一編曰事類詩文成一編曰文類蔡蕃晉如所撰晉如博學通書音律能屬文與十父相友善

洛中記異十卷

鼂氏曰皇朝秦再思記五代及國初識應雜事

洞微志十卷

鼂氏曰皇朝錢希白述記唐以來詭譎事

清異錄二卷

陳氏曰稱翰林學士陶穀撰凡天文地理花木飲食器物每事皆制爲異名新說其爲書殆似雲仙散錄而語不類國初人蓋假托也

乘異記三卷

鼂氏曰皇朝張君房撰其序謂乘者載記之名異者非常之事蓋志鬼神變怪之書凡十一門七十五事

陳氏曰咸平癸卯序取晉之乘之義也君房又有脞說家偶無之鼂公武讀書志以脞說爲張唐英君房撰又言君房著名臣傳蜀檣杙雲笈七籤行於世按君房祥符天禧以前人楊大年改閑忙令所謂紫微失却張君房者卽其人也嘗爲御史屬坐鞫獄貶秩因編修七籤得著作佐郎七籤序自言君房蓋其名非字也唐英字次功熙豐間人丞相商英天覺之兄作名臣傳蜀檣杙者與君房了不相涉不知鼂何以合爲一人也其誤明矣

括異記十卷

乾隆十二年校刊

經籍四十三

六

鼂氏曰皇朝張師正撰師正擢甲科得太常博士後游宦四十年不得志於是推變怪之理參見聞之異得二百五十篇魏泰爲之叙

祖異志十卷

鼂氏曰皇朝聶田撰田天禧中進士不中第至元祐初因記近時詭聞異見一百餘事天禧至元祐七十餘年田且百歲矣康定元年序

楊文公談苑八卷

鼂氏曰皇朝宋庠編初楊公億里人黃鑑哀撰平生異聞爲一編庠取而刪類之分爲二十一門

陳氏曰鑑書初名南陽談藪宋公刪其重複改曰談苑

歸田錄十卷

鼂氏曰皇朝李旼撰旼蜀人張詠客也與范鎮友善熙寧中致仕歸與門人賓客燕談忘倦門人請編錄之又名該聞錄書錄解題作十卷又有雜詩十二篇係於後

江鄰幾雜志三卷

鼂氏曰皇朝江休復撰休復歐陽永叔之執友其所紀精博絕人遠甚鄰幾其字也又名嘉祐雜志

開談錄兩卷

鼂氏曰皇朝蘇耆撰舜卿之父也記五代以來雜事下帙多載馮道行義

文會談叢一卷

陳氏曰題華陽上官融撰不知何人天聖五年序國老閑談二卷

陳氏曰稱夷門君玉撰不著姓

東齋記十卷

鼂氏曰皇朝范鎮景仁撰元豐中序言既謝事日於東齋燕坐追憶在朝時交游言語與夫俚俗傳

記因纂集成一篇崇觀間以其及國朝故事禁之
春明退朝錄三卷

鼂氏曰皇朝宋敏求次道撰多記國朝典故其序云熙寧三年予奉朝請於春明里因纂所聞也

南遷錄二卷

鼂氏曰皇朝張舜民芸叟撰舜民元豐中從軍攻靈州師還謫授柳州監酒卽日之官記塗中所歷并其詩文

夢溪筆談二十六卷

鼂氏曰皇朝沈括存中撰括好功名城永樂不克

貶死而實才高博學多技能音律星歷尤邃自序
云退處林下深居絕過從所與談者惟筆硯而已
故以名其書凡十七日

忘懷錄三卷

鼂氏曰皇朝元豐中夢溪丈人撰所集皆飲食器
用之式種藝之方可以資山居之樂者或云沈括
也

陳氏曰括坐永樂事閑廢晚歲乃以光祿卿分司
卜居京口之夢溪有水竹山林之適少有懷山錄
可資居山之樂者輒記之自謂今可忘於懷矣故

易名忘懷錄

郡閣雅言一卷

鼂氏曰皇朝潘若同撰太宗時守郡與僚佐話及
南唐野逸賢哲異事佳言輒疏之於書凡五十六
條以資雅言或題曰郡閣雅談書錄解題作郡閣
雜言題贊善大夫潘欲冲撰

祕閣閑談五卷

鼂氏曰皇朝吳淑撰記祕閣同僚燕談淑仕南唐
後隨李煜降丹陽人

牧豎閑談二卷

乾隆十二年校刊

經籍四十三

九

鼂氏曰皇朝景漁纂十九事景漁蜀人也
幕府燕閒錄十卷

鼂氏曰皇朝畢仲詢撰仲詢元豐初嵐州推官纂
當代怪奇可喜之事爲二十門

歸田錄二卷

陳氏曰歐陽修撰或言公爲此錄未傳而序先出
裕陵索之其中本載時事及所經歷見聞不敢以
進旋爲此本而初本竟不復出未知信否公自爲
序略曰歸田錄者朝廷之遺事史官之所不記與
夫士大夫笑談之餘而可錄者錄之以備閑居之

覽也又曰唐李肇國史補序云言報應叙鬼神述
夢卜近帷箔悉去之記事實探物理辨疑惑示勸
戒採風俗助談笑則書之余之所錄大抵以肇爲
法而小異於肇者不書人之過惡以謂職非史官
而掩惡揚善君子之志也覽者詳之

歸田後錄十卷

陳氏曰朝請郎廬江朱定國與仲撰熙豐間人竊
取歐公舊錄之名實不相關也

清夜錄一卷

陳氏曰沈括撰

續清夜錄一卷

陳氏曰王銍性之撰

苔川子所記三事一卷

陳氏曰不知何人三事者勃率姑王立林果毅皆異事也未有韓蟲兒一事是歐陽公所記偶錄附此

補妬記一卷

鼂氏曰古有妬記久而亡之不知何人輯傳記中婦人嚴妬事以補亡

陳氏曰稱京兆王績編不知何時人古有宋虞之

妬記等今不傳故補之自商周而下迄五代史傳所有妬婦皆載之未及神怪雜說文論等最後有治妬二方尤可笑也

茅亭客話十卷

鼂氏曰皇朝黃休復撰茅亭其所居也暇日賓客話言及虛無變化謠俗卜筮雖異端而合道旨屬懲勸者皆錄之

陳氏曰其所記多蜀事別有成都名畫記蓋蜀人也

褒善錄一卷

乾隆十二年校刊

文獻通考卷六十三 經籍四十三

七

鼂氏曰皇朝王蕃撰嘉祐中巴縣簿黃靖國死而復蘇道其冥中所見廖生嘗傳之蕃刪取其要爲此書

吉凶影響錄十卷

鼂氏曰皇朝岑象求編象求熙寧末間居江陵披閱載籍見善惡報應事輒刪潤而記之間有聞見者難乎備載亦採摘著於篇

勸善錄六卷

鼂氏曰皇朝周明寂元豐中纂道釋神奇禍福之效前人爲傳記者成一編以戒世

勸善錄拾遺十五卷

鼂氏曰不題撰人疑亦明寂所纂僅百事

雞跡集十卷

鼂氏曰未詳撰人所集書傳中瑣碎佳事分門編次之淮南子曰善學者如齊王食雞必食其跡名書之意殆以此

二百家事類六十卷

鼂氏曰分門編古今稗官小說成一書雖曰該博但失於大略不題撰人

漁樵閑話二卷

青瑣高議十八卷
鼂氏曰設漁樵問答及史傳雜事不知何人所爲

然其所書辭意頗鄙淺

悅神集一卷

鼂氏曰不題撰人記滑稽之說唐有邯鄲淳笑林此其類也

廣卓異記二十卷

陳氏曰樂史子正撰

王原叔談錄一卷

陳氏曰翰林學士南京王洙之子錄其父所言

湘山野錄三卷 續三卷

鼂氏曰皇朝熙寧中吳僧文瑩撰記國朝故事

玉壺清話十卷

鼂氏曰皇朝僧文瑩元豐中撰自序云瑩收國初至熙寧中文集數千卷其間神道墓誌行狀實錄奏議之類輯其事成一家言玉壺者其隱居之潭也

延漏錄一卷

陳氏曰不著名氏其間稱伯父郇公知其爲章得

象之姪也後題此書疑章望之作然未敢必望之者字表民用郇公廕入官歐陽公爲作字說者也以宰相嫌遂不仕錄中又記皇祐中與滕元發同試南廟滕首冠而已被黜籍令非望之亦當時塲屋有聲者章氏雋才固多也

紀聞一卷

陳氏曰集賢殿修撰李復圭審言撰淑之子也

東坡手澤三卷

陳氏曰今俗本大全集中所謂志林者也

艾子一卷

陳氏曰相傳爲東坡作未必然也

龍川略志六卷 龍川別志四卷

鼂氏曰皇朝蘇轍撰轍元符二年夏居循州杜門閉目追惟平昔使其子遠書之於紙凡四十事其秋復記四十七事龍川循州地名

古今前定錄二卷

鼂氏曰皇朝尹國均輯經史子集古今之人興衰窮達貴賤貧富死生壽夭與夫一動靜一語默一飲一啄定於前而形於夢兆於卜見於相貌應於識記者凡一門以爲不知命而躁競者之戒至若

裴度以陰德而致貴孫亮以陰譴而減齡之類又別爲二門使君子不以天廢人云

澠水燕談十卷

鼂氏曰皇朝王闢紹聖間撰澠水其退居之地也闢從仕四方與賢士大夫燕談有可取者輒記之久而得三百六十餘事

陳氏曰澠齊水名左傳有酒如澠闢治平四年進士

逆旅集

淮海秦觀撰自序曰余閑居有所聞輒書記之既

盈編軸因次爲若干卷題曰逆旅集蓋以其智愚好醜無所不存彼皆隨至隨往適相遇於一時竟亦不能久其留也或曰吾聞君子言欲純事書欲純理詳於誌常而略於紀異今子所集雖有先王之餘論周孔之遺言而浮屠老子卜醫夢幻神仙鬼物之說猥雜於其間是否莫之分也信誕莫之質也常者不加詳而異者不加略也無乃與所謂君子之書言者異乎余笑之曰鳥栖不擇山林惟其木而已魚遊不擇江河惟其水而已彼計事而處簡物而言切切然去彼取此者縉紳先生之事

也僕野人也擁腫是師懈怠是習仰不知雅言之可愛俯不知俗論之可卑偶有所聞則隨而記之耳又安知其純與駁邪然觀今世謂其言是則矍然改容謂其言信則適然以喜而終身未嘗信也則又安知彼之純不爲駁而吾之駁不爲純乎且萬物歷歷同歸一隙衆言喧喧同歸一源吾方與之沉與之游欲有取舍而不可得何暇是否信誕之擇哉子往矣客去遂以爲序

傅公嘉話一卷

鼂氏曰皇朝傅堯俞之子孫記堯俞之言行凡四

十餘章獻簡堯俞諡也

曾公南遊記一卷

鼂氏曰曾公未詳何人當是公亮之孫也共十二章記國朝雜事

摺紳脞說二十卷

鼂氏曰皇朝張唐英君房撰君房博學通釋老善著書如名臣傳蜀檣杙雲笈七籤行於世者母慮數百卷此書亦詳實

稗官志一卷

鼂氏曰皇朝呂大辨雜記其所聞前言往行

倦游雜錄八卷

鼂氏曰右皇朝元豐初張師正撰序言倦遊云者仕不得志聊書平生見聞將以信於世也自以非史官雖書善惡而不敢褒貶

東軒筆錄十五卷 續錄一卷

鼂氏曰右皇朝魏泰撰襄陽人曾布之婦弟爲人無行而有口頗爲鄉里患苦元祐中紀其少時公卿間所聞成此編其所是非多不可信心喜章惇數稱其長則大槩已可見又多妄誕姑舉其一如謂王沂公登甲科劉子儀爲翰林學士嘗戲之按

沂公登科雖在子儀後四年其入翰林沂公反在子儀前七年沂公咸平五年登科子儀天禧二年始除學士蓋相去二十年其謬至此

王氏曰魏泰者場屋不得志喜僞作他人著書如志怪集括異志倦游錄盡假名武人張師正又不
能自抑出其姓名作東軒筆錄皆用私喜怒誣讖
前人最後作碧雲駮假作梅堯臣毀及范仲淹而
天下駭然不服矣詳見碧雲駮條下

文獻通考卷第二百十六

文獻通考卷第二百十七

鄱陽馬端臨貴與著

經籍考四十四

子小說家

師友談記一卷

鼂氏曰皇朝李廌方叔撰多記蘇子瞻范純夫及四學士所談論故曰師友

青箱雜記十卷

鼂氏曰皇朝吳處厚撰處厚發蔡確車蓋亭詩所記多失實成都置交子務起於寇瑊處厚乃以爲

